



KENYATAAN MEDIA JABATAN ALAM SEKITAR

LAPORAN STATUS KUALITI UDARA DAN JEREBU DALAM NEGARA

Indeks Pencemar Udara (IPU) yang direkodkan di laman sesawang Jabatan Alam Sekitar (JAS) pada jam 1.00 tengah hari menunjukkan **lapan (8) kawasan mencatatkan status kualiti udara pada tahap baik, lima puluh lapan (58) kawasan pada tahap sederhana dan satu (1) kawasan mencatatkan bacaan IPU pada tahap tidak sihat**, iaitu:

1. Johan Setia, Selangor – IPU 137

Kualiti udara negara pada hari ini secara amnya berada pada tahap baik hingga sederhana kecuali di Johan Setia, Selangor yang merekodkan kemerosotan kualiti udara.

TINDAKAN JAS DI JOHAN SETIA

Susulan peningkatan bacaan IPU di Johan Setia, Selangor, **JAS telah mengambil tindakan segera dan proaktif dengan meningkatkan pemantauan serta rondaan di kawasan berkenaan** bagi memastikan tiada aktiviti yang berpotensi menyumbang kepada pencemaran udara.

Pemantauan dari udara menggunakan dron telah dilaksanakan dalam lingkungan radius **500 meter dari lokasi rondaan**. Hasil pemantauan tersebut **tidak menemui sebarang aktiviti pembakaran terbuka**.

Pemantauan secara darat yang dilaksanakan oleh pasukan JAS turut mendapati **tiada sebarang aktiviti pembakaran terbuka** di kawasan yang dipantau. Sebagai tindakan pencegahan segera, **JAS telah memasang banner larangan pembakaran terbuka di lokasi tersebut** bagi meningkatkan kesedaran serta menghalang sebarang aktiviti pembakaran terbuka daripada berlaku.

Secara keseluruhannya, hasil pemantauan dan rondaan JAS mendapati **keadaan di kawasan Johan Setia adalah terkawal daripada sebarang aktiviti pembakaran terbuka pada masa pemeriksaan dijalankan.**

JAS akan terus mempertingkatkan rondaan dan pemantauan secara **darat dan udara**, di samping memantau bacaan IPU dari semasa ke semasa bagi memastikan sebarang potensi sumber pencemaran dapat dikenal pasti dan tindakan sewajarnya diambil dengan segera.

Berdasarkan laporan oleh *ASEAN Specialised Meteorological Centre (ASMC)* yang berpusat di Singapura pada **16 Ogos 2026**, imej satelit ***National Oceanic and Atmospheric Administration (NOAA) 20***, terdapat **323 titik panas (hotspot) dikesan di Kalimantan, 61 titik panas (hotspot) dikesan di Sumatera dan 1 titik panas (hotspot) dikesan di dalam negara iaitu 1 di Pahang.**

Peta Jerebu Serantau yang dikeluarkan oleh *ASEAN Specialised Meteorological Centre (ASMC)* pada 17 Ogos 2026 menunjukkan keadaan cuaca kering berlaku di kebanyakan kawasan di rantau ASEAN selatan. Titik panas bertaburan dikesan di Kalimantan, manakala beberapa titik panas turut dikesan secara terpencil di kawasan lain di rantau ASEAN selatan. Kepulan asap sederhana hingga padat diperhatikan berpunca daripada kelompok titik panas di kebanyakan kawasan di Kalimantan. Kepulan asap ringan hingga sederhana turut diperhatikan berpunca daripada titik panas yang dikesan di bahagian tengah Sumatera. Beberapa stesen pengawasan kualiti udara di Sumatera dan Kalimantan merekodkan bacaan pada tahap Tidak Sihat hingga Berbahaya. Walau bagaimanapun, liputan penuh situasi titik panas dan jerebu di rantau ini tidak dapat ditentukan berikutan liputan awan.

JAS telah meningkatkan tindakan penguatkuasaan dan aktiviti rondaan harian ke kawasan-kawasan yang berpotensi berlakunya aktiviti pembakaran terbuka serta memantau bacaan IPU dari masa ke semasa.

Pelan Tindakan Pembakaran Terbuka Kebangsaan dan Pelan Tindakan Jerebu Kebangsaan telah diaktifkan bagi menyelaraskan tindakan-tindakan agensi Kerajaan dalam menangani isu pembakaran terbuka dan menghadapi situasi jerebu negara.

Semua pemilik tanah dinasihatkan supaya memantau secara rapi kawasan-kawasan yang mudah dan sering terbakar seperti tapak pelupusan sampah, hutan, tanah gambut, ladang, kawasan pertanian dan industri serta mengambil langkah-langkah untuk mencegah pencerobohan oleh pihak-pihak yang tidak bertanggung jawab sehingga menyebabkan pembakaran terbuka sama ada untuk tujuan tertentu atau dengan tidak sengaja.

NASIHAT KEPADA ORANG RAMAI

- Bacaan IPU terkini setiap jam boleh dirujuk di laman sesawang Jabatan Alam Sekitar (JAS) di alamat url, <https://eqms.doe.gov.my/APIMS/main> atau dengan memuat turun aplikasi telefon pintar rasmi MyJAS EQMS di 'Google Play' atau 'App Store';
- Orang ramai dinasihatkan melayari laman sesawang Kementerian Kesihatan Malaysia (www.moh.gov.my) bagi mendapatkan nasihat kesihatan dan langkah-langkah pencegahan semasa jerebu;
- Orang ramai diingatkan **agar tidak melakukan pembakaran terbuka atau membiarkan tanah atau premis kepunyaan mereka dimasuki atau dicerobohi oleh pihak-pihak yang tidak bertanggungjawab sehingga menyebabkan pembakaran terbuka untuk tujuan tertentu atau dengan tidak sengaja.** Akta Kualiti Alam Sekeliling (Pindaan) 2024, kadar denda telah dinaikkan kepada minimum RM25,000 dan maksimum RM1,000,000, atau

penjara sehingga 5 tahun, atau kedua-duanya. Di samping itu, kompaun sehingga tidak melebihi 50% denda maksimum boleh dikenakan atas setiap kesalahan; dan

- Orang ramai diminta bekerjasama untuk memadam kebakaran-kebakaran kecil dan juga melaporkan kes-kes pembakaran terbuka atau kebakaran kepada Jabatan Perkhidmatan Bomba dan Penyelamat di talian **999** dan Jabatan Alam Sekitar (JAS) di talian bebas tol, **1-800-88-2727**

HAJAH AZURI AZIZAH BINTI HAJI SAEDON
TIMBALAN KETUA PENGARAH (PEMBANGUNAN)
17 OGOS 2026



Unit Komunikasi Korporat | Jabatan Alam Sekitar (JAS)
Tel. : 03-8000 8000 | Faks : 03-8889 4763

Peta Jerebu Serantau Yang Dikeluarkan Oleh ASMC Pada 17 Ogos 2026

